

**ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ
ҚАРОРИ**

**РЕСПУБЛИКАДА СОТИЛАДИГАН МАИШИЙ ЭЛЕКТР ПРИБОРЛАРИНИ,
ЯНГИДАН ҚУРИЛАДИГАН БИНОЛАР ВА ИНШООТЛАРНИ ЭНЕРГЕТИКА
ЖИҲАТИДАН МАЖБУРИЙ МАРКИРОВКАЛАШ ВА СЕРТИФИКАТЛАШ
ТИЗИМИНИ ЖОРИЙ ЭТИШ ЧОРА-ТАДБИРЛАРИ ТЎҒРИСИДА**

Ўзбекистон Республикаси Вазирлар Маҳкамасининг «Саноатда ишлаб чиқариш харажатларини қисқартиришга ва маҳсулот таннархини пасайтиришга доир қўшимча чора-тадбирлар тўғрисида» 2015 йил 22 январдаги 8-сон қарорига мувофиқ ҳамда четдан олиб кириладиган ва сотиладиган маиший электр приборларининг, шунингдек Ўзбекистон Республикасида янгидан қуриладиган бинолар ва иншоотларнинг энергия самарадорлигини таъминлаш мақсадида Вазирлар Маҳкамаси қарор қилади:

1. Белгилаб қўйилсинки, 2016 йил 1 январдан бошлаб:

а) техник ҳужжатларида, маркировкасида ва этикеткаларида энергия самарадорлигининг тегишли классификациясидаги ахборотларнинг мажбурий мавжуд бўлиши ҳақидаги талаб иловага* мувофиқ бўлишига қўйиб, четдан олиб кириладиган ва Ўзбекистон Республикаси ҳудудида сотиладиган маиший электр приборларига татбиқ этилади;

* Илова рус тилидаги матнда берилган.

б) маиший электр приборларининг энергия самарадорлиги классларини аниқлаш учун «А», «В», «С», «D», «Е», «F», «G» белгилари жорий этилади. Бунда:

«А» классификацияси энергия самарадорлиги энг юқори бўлган маиший электр приборларини белгилаш учун ва тегишли равишда «G» классификацияси — (тавсифларини ҳисобга олган ҳолда) бир тоифага киритилган маиший электр приборлари жумласидаги энергия самарадорлиги энг кам бўлган маиший электр приборларини белгилаш учун қўлланади;

энергия самарадорлигининг «А+», «А++» (ортиб боришига кўра — А+», «А++» ва шу каби) ҳамда ундан юқори қўшимча класслари «А» классификацияси учун белгиланган энергия самарадорлиги даражасидан ошадиган энергия самарадорлигига мансуб бўлган маиший электр приборларини белгилаш учун қўлланади.

2. Техник ҳужжатларида, маркировкасида ва этикеткаларида электр самарадорлигининг тегишли классификациясидаги ахборотлар мавжуд бўлмаган ушбу қарорга иловада кўрсатилган маиший электр приборларини четдан олиб кириш 2016 йил 1 январдан бошлаб, уларни Ўзбекистон Республикаси ҳудудида сотиш эса — 2016 йил 1 июлдан бошлаб тақиқлансин (илгари фойдаланишда бўлган маиший электр приборларини сотиш бундан мустасно).

Бунда ушбу қарорга иловада кўрсатилган, 2016 йил 1 январгача «вақтинча сақлаш» ва «божхона омбори» божхона режимларида жойлаштирилган маиший электр приборлари, истисно тариқасида эркин муомалага чиқарилиши ва 2016 йил 1 июлгача сотилиши мумкин.



LexUZ шарҳи

2-банднинг иккинчи хатбошисига Ўзбекистон Республикаси Вазирлар Маҳкамасининг 2016 йил 20 июндаги 211-сонли қарори билан ўзгартириш киритилган. Рус тили матнига қаранг.

3. Энергия самарадорлигининг «G» классификациясига мансуб бўлган маиший электр приборларини четдан олиб кириш ва сотиш — 2017 йил 1 январдан бошлаб, «F» классификациясига мансуб бўлган маиший электр приборларини четдан олиб кириш ва сотиш — 2018 йил 1 январдан бошлаб ва «E» классификациясига мансуб бўлган маиший электр приборларини четдан олиб кириш ва сотиш — 2019 йил 1 январдан бошлаб босқичма-босқич тақиқлансин.



LexUZ шарҳи

3-банд Ўзбекистон Республикаси Вазирлар Маҳкамасининг 2016 йил 20 июндаги 211-сонли қарори билан ўзгартириш киритилган. Рус тили матнига қаранг.

4. Белгилансинки, ушбу қарорга иловада кўрсатилган, техник ҳужжатларида, маркировкасида ва этикеткаларида энергия самарадорлигининг тегишли классы тўғрисидаги ахборотлар мавжуд бўлмаган маиший электр приборларини сотиш ва сотиш мақсадида сақлаш ушбу қарорда назарда тутилган муддатлар ўтгандан кейин сотиш қоидаларини бузиш деб ҳисобланади ва қонунчиликда белгиланган тартибда жавобгарлик чоралари қўлланади.

5. «Ўзэлтехсаноат» акциядорлик компанияси «Ўздавэнергоназорат» инспекцияси, «Ўзбекэнерго» давлат-акциядорлик компанияси ва «Ўзстандарт» агентлиги билан биргаликда ушбу Низомга иловада кўрсатилган маиший электр приборларининг техник ҳужжатларида, маркировкасида ва этикеткаларида энергия самарадорлигининг тегишли классы тўғрисидаги ахборотлар мажбурий бўлиши ҳақидаги талабни назарда тутувчи стандартлаштириш бўйича норматив ҳужжатларни 2015 йил 1 сентябргача бўлган муддатда ишлаб чиқсин ҳамда белгиланган тартибда давлат рўйхатидан ўтказсин.

6. «Ўзстандарт» агентлиги маҳаллий ва хорижий ишлаб чиқарувчиларнинг маиший электр приборларининг энергия самарадорлиги бўйича муайян классга мувофиқлигини баҳолаш ва тасдиқлаш бўйича синаш (ўлчаш) лабораторияларининг (марказларининг) ҳамда электротехника маҳсулотларини сертификатлаш органларининг белгиланган тартибда аккредитация қилинишини таъминласин.

7. Ўзбекистон Республикаси Давлат божхона қўмитаси Давлат солиқ қўмитаси билан биргаликда ушбу қарорнинг талабларига мувофиқ энергия самарадорлиги классы тўғрисидаги тегишли ахборотлар мавжуд бўлмаган маиший электр приборларининг четдан олиб кирилишига ва республика ҳудудида сотилишига йўл қўймаслик юзасидан назорат ўрнатсин.

8. Ўзбекистон Республикаси Давлат архитектура ва қурилиш қўмитаси шаҳарсозлик нормалари ва қоидаларини уларда янгидан қуриладиган бинолар ва иншоотларга нисбатан қўйиладиган энергия самарадорлиги тўғрисидаги тегишли талабларнинг мавжудлиги юзасидан олти ой муддатда қайта кўриб чиқсин.

9. «Ўздавэнергоназорат» инспекцияси манфаатдор вазирликлар ва идоралар билан биргаликда 2015 йил 1 сентябргача бўлган муддатда Вазирлар Маҳкамасига қонун ҳужжатларига ушбу қарордан келиб чиқадиган ўзгартириш ва қўшимчалар тўғрисида таклифлар киритсин.

10. Вазирликлар ва идоралар ўзлари қабул қилган идоравий норматив-ҳуқуқий ҳужжатларни икки ой муддатда ушбу қарорга мувофиқлаштирсинлар.

11. Мазкур қарорнинг бажарилишини назорат қилиш Ўзбекистон Республикаси Бош вазирининг ўринбосарлари Ғ.И. Ибрагимов ва У.У. Розуқулов зиммасига юклансин.

Ўзбекистон Республикасининг Бош вазири Ш. МИРЗИЁЕВ

Тошкент ш.,
2015 йил 9 апрель,
86-сон

(Ўзбекистон Республикаси қонун ҳужжатлари тўплами, 2015 й., 14-сон, 171-модда, 2016 й., 25-сон, 308-модда)